


Ieslandjs

Van Wikipedia

Dit artikel is gesjreve (of begós) in 't Mofers. Laes hie wie v'r mit de versjillende saorte Limburgs ómgaon.

't **Ieslandjs** (*íslenska*) is 'n Noeardj-Germaanse spraok mit bao 300.000 spraekers. 't Is de officieel spraok van Ieslandj. 't Ieslandjs behuurtj same mit 't Faeröers toet de westelike of eilandj-Scandinavische tale. 't Is neet good te verstaon veur spraekers van de Scandinavische tale van 't vastelandj: Noors, Zweeds en Deens.



E book mit Ieslandjse tèks.

Inhawd

Alfabet

Gesjiedenis

Grammair

Taalpurisme

Extern linke

Alfabet

't Ieslandjs wuurtj mit 't Letiens alfabet gesjreve, woraan versjillendje teikes zeen toegevoog: Áá, Éé, Íí, Óó, Úú, Ýý, Ðð (edh), Þþ (thorn), Ææ en Öö. De alfabetische vólgorde is: A Á B (C) D Ð E É F G H I Í J K L M N O Ó P (Q) R S T U Ú V (W) X Y Ý (Z) Þ Æ Ö.

De speciaal letter thorn (þ) guuef de klank weer die me ouch taengekömp es de th in 't Ingelse *think* (óngeveer es de Griekse letter Θ (theta), en de eth (ð) is dao de stömhöbbendje variant van (es de th in 't Ingelse *that* of de Griekse letter Δ (delta)), de letter ð steit in 't Ieslandjs noeaits aan 't begin van e woord en de letter þ steit noeaits aan 't ènj van e woord. Dees letters kómme oet 't aad runenalfabet.

De letters c, q, w en z waere neet gebroekt, behalve veur wäörd en name van neet-Ieslandjse aafkóms. Wiejer klinke i en y geliek, zjuus wie í en ý. De in ónbroek geraakdje z klink es s, zjuus wie in in al anger Noeardj-Germaanse tale.

Gesjiedenis

Ieslandj waerdje tösje 800 en 1000 bevólk vanoet Wès-Noorwege. 't Ieslandjs haet zich óntwikkeldj oet 't Aadnoors. In Noorwege vónje, zjuus wie in de res van 't Germaanse taalgebied, in de ieëuwe daonao groeate taalverangeringe plaats, al den neet veroeorzaak door de intensieve contacte mit de Nederduits kallendje hanjelsluuj van de Hanze, mer óp 't aafgelaenge Ieslandj gebäördje det bao neet en bleve de waordesjat en 't verbugingssysteem vriewaal ónverangerdj. De oetspraok is waal verangerdj. 't Ieslandjs bezit 'n aantal foneme die zeldzaam zeen in anger Europees tale, wie 'n stömloeas *l*, *n*, *m* en *r*.

Grammair

In 't Ieslandjs is 't aad Scandinavisch verbugingssysteem dös nag gans intak. Al zelfstanjig naamwäörd, bievooglik naamwäörd, lidwäörd, aanwiezendje veurnaamwäörd, bezittelik veurnaamwäörd, eigename, (rang)telwäörd enzoea waere verbaoge in veer naamvalle, die veur alle drie woordgeslachte apaarte vorme kinne. Daonaeve kintj 't Ieslandjs nag sterke en zwakke verbuginge.

Veur 't zich vólk hie de verbuging van 't ónregelmaotig mannelik woord fjörður, 'fjord'.

	inkelvoud	mieëvoud
<u>nominatief</u>	fjörður	firðir
<u>genitief</u>	fjarðar	fjarða
<u>datief</u>	firði	fjörðum
<u>accusatief</u>	fjörð	firði

't Bepaald lidwoord wuurtj, zjuus wie in de anger Scandinavische tale, achter 't zelfstanjig naamwoord geplak (*aangehech lidwoord*), wodoor vorme óntstaon wie *fjarðarins* 'van de fjord', *fjörðunum* 'aan de fjorde'. 't Ónbepaaldj lidwoord kintj me in 't Ieslandjs neet. Fjörður kin dös beide 'fjord' es 'ne fjord' beteikene, veur de verdudeliking kintj me 't getal *einn* (ein) broeke.

Taalpurisme

'n Ópvallendj kinmerk van 't Ieslandjs is 't strang purisme, det 'ne groeaten invlõi óp de óntwikkeling van de taal haet gehad. Wo de anger Germaanse tale euverspeuldj waerdje mit lieënwäörd oet 't Frans en 't Latien en de vastelandj-Scandinavische tale baovedeen mit lieënwäörd oet 't Nederduits, haet me in Ieslandj ömmer getrach veur de benaming van nuuj begrippe oet de brón van erfwäörd te putte. 't Ieslandjs is 'n rieke taal, vanwaenge de vāöl ieëuwe sagaliteratuur. Daodoor kós me dök vergaete wäörd oet 't verleje nömme óm nuuj begrippe aan te duje. Zoea waerdje 'telefoon' *sími*, nao e aad woord veur 'draod', en 'sjerm' (beildjsjerm, computersjerm) *skjár*, nao e aad woord veur 'vèenster'.

Extern linke

- Wikipedia op 't Ieslands (<https://is.wikipedia.org/>)
- BRAGI (<http://www2.hu-berlin.de/bragi>): Euver 't Ieslands, in 't Ieslands en Duits

Aafkomstig van Wikipedia, de Vriey Encyclopedie. "<https://li.wikipedia.org/w/index.php?title=Ieslandjs&oldid=383621>"

Dees pazjena is 't lèts verangerd op 16 nov 2015, 16:19.

De teks is besjikbaar ónger de Creative Commons Naomsvermelding/Geliek Deile licentie. 't Is määgelik dat aanvöllende veurwaarde van toepassing zeen. Betrach de Algemein veurwaarde veur mie informatie.